



Održan okrugli stol o ostvarivanju naknade štete u okviru krivičnog postupka za žrtve rata u BiH

Dvadeset godina kasnije, mnoge žrtve ratnih zločina još uvijek čekaju na ostvarivanje njihovih osnovnih prava

Sarajevo, 2. decembar 2015. godine – Više od 20 stručnjaka iz pravosuđa, međunarodne zajednice i organizacija civilnog društva razgovarali su danas u Sarajevu, po prvi put, o pitanju dosuđivanja naknade štete žrtvama ratnih zločina. Na koji način one mogu ostvariti imovinskopravni zahtjev u okviru krivičnog postupka? Kako se postojeća praksa može poboljšati? su samo neka od pitanja koja su diskutivana tokom okruglog stola, održanog u organizaciji nevladine organizacije TRIAL.

“Nakon revolucionarnih presuda Suda BiH iz juna ove godine, neophodni su dodatni naponi kako bi se stvorile sistemske pretpostavke da naknada štete u okviru krivičnog postupka bude dosuđivana i drugim žrtvama,” izjavila je Adrijana Hanušić, pravna savjetnica TRIAL-a. “Današnji okrugli sto, predstavlja prvi i značajan korak u tom smjeru,” dodala je Hanušić.

Naime, po prvi put u historiji BiH, dvjema osobama, preživjelim ratnog seksualnog nasilja, u okviru krivičnog postupka dosuđena je naknada štete, na način da su presudama počinioci ratnog zločina obavezani isplatiti određeni novčani iznos zbog patnje kroz koju su prošle. S tim u vezi, jedno od glavnih pitanja o kojem je diskutovano je bilo i koji su sljedeći koraci. Učesnici su se složili da je od najvećeg značaja osigurati da se dalji rad pravosuđa nastavi u ovom pozitivnom pravcu i da druge žrtve pristupe pravdi na koju još uvijek čekaju. U praksi, ovo podrazumijeva i pristup njihovom pravu na naknadu nematerijalne štete, u okviru krivičnih postupaka, pred sudovima na svim nivoima, u cijeloj BiH. Tokom diskusije bilo je govora i o drugim temama, kao što su potreba za izmjenama postojećeg zakonodavstva, važnosti edukacije sudija i tužioca, besplatnoj pravnoj pomoći za žrtve, itd.

Dvadeset godina po završetku rata u BiH, mnoge žrtve ratnih zločina još uvijek čekaju na pravdu. Transparentan i efikasan sistem dodjele naknade štete u krivičnom postupku omogućio bi ovim ženama i muškarcima da dobiju bar dio priznanja za nanesenu bol i patnju s kojom i dan danas žive.

Okrugli stol je organiziran kao dio projekta koji podržava Ured za inostranstvo i Commonwealth Velike Britanije. Cilj projekta je, između ostalog, stvaranje potrebnih preduvjeta kako bi žrtvama seksualnog nasilja u ratu u okviru krivičnih postupaka bio osiguran pristup njihovom pravu na naknadu nematerijalne štete pretrpljene usljed počinjenog zločina, kao i da se osigura neometana provedba presuda, kojima se ta naknada štete dodjeljuje. TRIAL će također nastaviti sa zagovaranje uspostavljanja fonda iz kojeg bi se isplaćivale žrtve od strane države, uz naknadnu refundaciju tog novca od počinilaca, čime bi se sa žrtava skinuo teret prolaska kroz dugotrajne izvršne postupke.

Zaključci će biti dostupni na web stranici www.trial.ba

Za više informacija, molimo kontaktirajte Adrijanu Hanušić, na broj 061 139 707, ili na adrijana.hanusic@trial-ch.org.

TRIAL (Track Impunity Always)
Čobanija 19
71 000 Sarajevo, BiH
e-mail: bh@trial-ch.org
Tel/Fax: +38733 219 873
www.trial.ba